

列女傳

古之談禮教者重胎教今之談教育者重母教胎教母教皆原於
閨門賢媛淑女所係於風化名教者爲何如哉況其貞操節烈足
以型世而感人詎可湮沒不傳乎作列女傳

明

邢氏坊里人邢居之女張承祖妻承祖卒氏年二十五歲無子堅
守婦道誓不改嫁洪武十六年奉旨旌表

朱氏王勇里人生員宋朝妻適朝甫六年朝卒無子遺幼女二時
氏年僅二十耳諸富家爭欲娶之氏指水爲誓家貧紡績以自
存活撫二女成立并適士人孀居六十餘年享壽八十餘歲而

卒

宋氏節婦朱氏長女生員董鳳來妻鳳來卒遺子五歲氏年二十有四誓死不嫁每與親屬曰吾忍不死者爲此孤也食淡甘貧嚴以教子子後成立入泮氏年七十以壽終

姚氏徐氏韓洪里人姚氏任甸妻甸卒姚氏年二十六撫子任自立成立娶婦徐氏自立病徐氏時年十八知夫疾不起先投繯而逝沁州知州張嘉績扁其門曰姑媳雙節知縣侯體乾過其里爲文以祭徐氏復扁其門曰姑媳貞節萬歷四十八年知縣杜汝懋申院具題奉旨旌表建貞烈坊

任氏生員王崇化妻年二十二歲而寡無子痛哭幾絕悉以家事

付家人誓以死殉家人尙莫之信也次日果自縊而死事聞上臺扁其門曰苦節傳芳

李氏監生胡夢龍妻年二十七生子四人夢龍疾篤囑氏守節撫養幼孤氏遵夫遺言停柩於室朝夕哭奠曰必待諸子成立方理葬事厥後族長欲氏改適氏剪髮毀容以死自誓延師訓子極其嚴峻長子養正生員次子養大官肅州衛教授三子養賢生員四子養心生員養心之子來賀亦早歲入泮上臺屢給布粟旌獎扁其門首曰貞節氏年八十餘卒

李氏生員郭奎光妻奎光卒氏年二十八有強族欲逼氏改適者氏誓死不從安貧守志撫養二子成立長衛民生員恩贈儒官

次安民萬歷癸卯科舉人官鞏昌府同知人謂氏以一人兼共
姜孟母之賢屢蒙兩院旌獎

雷氏李同春妻年二十七夫亡遺子鉉甫週歲舅姑慮其不能終
操氏於月朔焚香對神立誓永不再醮家貧茹荼紡績課子讀
書鉉竟入泮萬歷四十八年知縣孫夢麟扁其門曰苦節丸熊
復申請兩院蒙給布粟旌獎氏八十有七而終

郭氏郭周才女廩生陰根陽妻根陽卒氏年二十七剪髮毀容誓
不再嫁逾十二載翁亡姑耄族叔以氏方中年逼令改適氏舉
刀自刎而卒時萬歷三十四年也知縣李培聰扁其門首曰貞
申院請旌清順治二年知縣劉璣扁其門曰節孝雙全子陰鳴

臯生員孫陰貞歲貢陰燮生員曾孫陰位乾陰助乾俱庠生書香奕世人以爲苦節之報云

清

南氏生員李一槐妻適槐三歲而寡年甫一十九歲子本生兩月矣氏毀容絕粧誓以身殉時舅姑在堂慰以存孤爲重乃竭力事親鞠子苦節五十餘年壽近八旬無病而逝本子瑞華入泮瑞華子御珍膺選拔任孟縣教諭子孫繩繩不絕皆氏忍死存孤之報也順治間蒙按院黃旌獎扁其門曰節孝雙全

王氏庠生王運恒女王攀龍妻居閭寨村順治六年寇至氏回母家避難過五龍溝口爲賊所獲誓死不辱賊怒斷其手足而死

李氏廩生李完白女生員王簡妻居暢村順治六年寇至被搶行至中峪店約數十里屢自墮馬罵賊不屈遂被殺

李氏劉萬祚妻居賢友村順治六年寇至夫妻逃難遇賊夫被害氏罵賊不絕口賊怒殺之

王氏庠生董鏗妻康熙二十六年夫亡氏年二十七歲誓不再嫁無子撫幼叔成立婚娶以延董祀曰吾事畢矣於二十九年三月遂投繯而死是年邑令王容德旌其門曰苦節可風又曰心堅金石志潔冰霜甘茹苦而撫幼叔拮据代婚俟成名而從故夫慷慨全節生不愧生死不虛死誠閨中之義烈者也特旌木額用慰香魂

郭氏廩生胡璞妻夫亡奉八十歲姑宋氏克盡孝養歲饑自啖糠粃供姑稻糧享壽九十髮白反黑康熙三十二年知縣陳正樂扁其門曰懿孝

郭氏拔貢郭鼎贊妻夫死遺二女氏柩前自經者三死而復甦盡以家業治夫喪啜糠飲水歷三十九年如一日壽七十八終姚氏廩生李翼經妻夫亡年二十九立志守貞人有勸之嫁者輒怒曰上有翁姑夫死即婦事也自操井臼奉養四十餘年翁姑悉臻耄壽知縣韓瑛給扁曰貞烈孝慈子垂善廩生

朱氏李翼經弟衛經之妻也衛經兄弟繼亡氏年亦二十九撫育幼子誓無改志其翁泣曰二子俱亡天喪我也長媳不嫁次媳

必嫁之氏曰姆爲人婦獨非人乎乃與姚氏共奉翁姑朝暮相依歷四十餘年鄉人稱曰雙節婦知縣韓瑛扁曰冰霜金石

劉氏郭在祿妻年二十八夫亡子甫八歲苦節不改嫁壽至七旬餘知縣韓瑛扁曰冰心苦節

宋氏郭有麟繼妻夫亡矢死不嫁撫育前妻子成立苦節四十年壽七旬而卒

任氏鄭一貴妻夫被虎傷氏年二十二僅遺二女誓不改嫁啖糠菜撫養三侄孫成立苦節五十年壽七旬有餘卒

郭氏儒士姚殿揚之妻殿揚苦志讀書遘病卒臨訣囑氏曰汝若再嫁幼孤弱女皆不能生矣時氏年二十有五對夫自誓毀容

苦守室中常設夫靈每飯必祭足不出戶者四十年撫其子姚鵬俾得成立女適生員胡恂卒如夫志

李氏王仲妻貢生李琬女也姑病親奉湯藥不避污穢常禱願以身代姑歿奉翁益篤孝養年二十四而卒鄉人哀之稱爲純孝
劉氏興居村民李遇時妻夫死氏年二十有奇遺子尙在襁褓家貧如洗氏矢志守節備歷艱辛撫其子璐成庠生寡居五十餘年未嘗苟言笑無事不出閨門壽至八十猶然知縣韓瑛扁曰柏舟苦志

史氏郭維屏妻夫早歿氏孀居撫孤獻瑾入泮瑾又早亡遺孫斌曾孫隆郡附郡皆氏撫育成立壽八十三卒

李氏郭中芳妻夫亡氏年甫二十一子鼎匡六歲鼎立四歲氏誓不再醮撫二孤入泮食餼冰操五十餘年壽七十五卒

李氏廩生胡應乾妻夫死年二十有九食貧守節養姑盡孝教育子祚綏祚鞏並列宮牆歷四十餘年壽七十有六而卒

唐氏廩生董宗永妻夫死氏年二十有四遺孤甫四月氏紡績織絰以爲業教子成立補弟子員名成年七旬有一卒

賈烈女張四維聘妻名梅枝生而柔嘉一言一動迴異常女家人咸愛重之擬爲女選擇佳婿時張四維從其祖舉人張程在太原府訓導署內讀書女胞伯父賈懋德肄業晉陽書院見四維讀書有造以梅枝許之後四維染患時症尙未痊愈即事攻苦

轉成癆瘵由省歸家即行殞命女聞訃哭泣不休欲奔喪守制其姑郭氏因女多受累執意不允女乃罷鍼鬻厭飲食寡言語精神日減成氣厥疾歲貢崔述古精岐黃術女姑丈也距女家十里許女父母延請醫治女執言無疾不令診視崔窺女志在殉夫曰有女如此家門之慶也不醫亦可有知張子之逝求婚者媒來一次女病增一次最後有某姓門戶相當父母惑於俗說欲許婚以冲女病女曰是速我死也從此愈加沈重飲食全不入口竟至溘然而逝因距夫家遙遠當時未及祔四維葬權厝於母家墳側後四維祖父及父相繼而歿此事未得速行辦理後於同治三年四維胞弟生員張澍始啟女觀與四維合葬

焉女生於嘉慶七年十月十五日嘉慶十九年許與四維爲妻
嘉慶二十三年四月十七日四維病故女尙未過門聞訃不食
於是年七月十四日殉夫地下同治五年闔學具稟請旌入祠
胡貞女宋維明之聘妻也邑令黃家禎傳曰咸豐五年歲乙卯冬
余奉命出宰沁源明年丙辰春旣下車迄今年己未四年矣愧
無以振興風教心滋慙焉夏四月聞胡貞女事實嘉尙之竊念
此數年中率少一二可傳之事以之勸風厲俗而里黨矜式也
若貞女者可爲邑乘光矣逾月其親鄰劉生臣心等具貞女節
孝狀以聞抑謂闡揚潛德守土者之責歟余安可以不文辭按
貞女姓胡氏處士飛鳳之女而宋生維明之聘室也生年十七

女長生一歲親迎將有期生忽遘暴疾卒女聞之悲曰君子疾沒世而名不稱吾將有以成夫子之名也乃誦柏舟之詩以見志父母難之女泣血絕食飲以死自矢父母感其誠以情白宋翁姑哀之爲具輿馬迎歸焉是日也觀者如堵牆識與不識咸嘖嘖嘆賞以爲得未曾有且夫沁邑最爾彈丸也處深山之中官於斯居於斯者都不以地重然而固古節義之鄉也綿上之田在焉夫介子去今遠矣遠則無徵而寒食紙錢不作蝴蝶之飛千古化之矣况觥觥然屬人耳目者乎觀夫柏舟一葉中流自在女貞一樹歲寒有心是足以生山川之色而供風人之諷詠豈僅傳宋生而已哉余故樂書其事復爲長歌以紀之爰命

梓人俾作楹榜於月吉日率同官具鼓吹一部以旌其門若夫
綽楔恩榮自有國家大典禮在姑以待後之宰斯土者詩曰
不願生同衾但願死同穴之死矢靡他蒼蒼曷有極君不見南
山白石有時爛東海桑田有時變惟有炳炳烺烺貞女貞千秋
萬歲直與日月爭光明

吳氏生員李敬德妻二十四歲而寡家貧紡績度日事翁姑色養
備至翁姑有疾湯藥親嘗默禱身代歿後竭力營葬無不中禮

守節四十一載乾隆十九年旌表

已載沁
州續志

陰氏增生郭室繼妻貢生陰倬之女素嫻姆教十七歲適郭事孀
姑惟孝相夫子以敬二十七歲夫乃徂落遺二女年頗長子巍

秦尙幼與夫兄同居夫兄性好揮霍不數年家資漸絀氏從無怨言誓不改節操井白勤鍼黹備嘗艱苦教子成立姑歿喪葬式禮莫愆前任孟公嘉其節額其門曰德婉孟陶

郭氏貢生郭有人之女年十九歲配胡希典希典客死於外氏年二十三歲遺子附鳳尙在襁褓貧無立錫氏針黹營生守節撫孤四十五年武鄉知縣嚴公匾曰苦節全貞

王氏胡宰字妻封翁王澈之女賢孝性成二十七歲而寡家奇窮盲姑在堂遺子在抱仰事俯育歷備艱辛後姑年愈邁行動艱難氏攜持保抱滌除糞穢從無怨嫌鄉里稱爲賢孝

南氏石臺村南廣德之女適張炎爲繼妻年十七歲於乾隆二十

四年夫亡時氏年二十三歲計守節三十六年艱苦備嘗始終如一允服輿情節烈例堪表揚

胡氏監生李掄繼配武生胡宰之女年十七歸李十九歲夫亡遺子清杭未週歲前妻遺子清柱亦弱齡氏矢志守節撫養二子一言一動必依禮法後清柱入貢成均清杭登嘉慶辛酉賢書皆氏教誨之力也孀居六十餘年享壽八十三歲

以上乾隆年節婦同治八年旌表

劉氏監生武明德側室事姑孝事嫡如事姑生子丕承明德棄世氏年二十九歲守節撫孤使其子十七歲入學夜間課讀形影相伴理家備極周至享壽七旬